

NY TENY FIAINANA

"Fa Kristy no faran'ny lalàna ho fahamarinana ho an'izay rehetra mino."

Romana 10:4

LALAO'NY FRANKOFONIA 2023

Tafaverina ny delegasiona Malagasy, tsy nitsanga-menatra

Tsy nitsanga-menatra, tafaverina an-tanindrazana tamin'ny talata 08 Aogositra 2023 ny delegasiona Malagasy, izay nitondra avo ny voninahy-pirenena nandritra ny lalaon'ny frankofonia natao tany Kinshasa, République Démocratique du Congo. Tsihivina fa laharana faha-13 no misy an'i Madagasikara ary nahazo medaly miisa 09 (Volamena 03, Volafotsy 04 ary Alimo 02) azo tamin'ny taranja judo, basikety, tolona, tenisy ambony latabatra ary atletisma tamin'ny fifaninana iny. Tonga nitarika ny fitsenana azy ireo ny tompon'andraikitra isantsokajiny eo anivon'ny Minisiteran'ny Tanora sy ny Fanatanjahantena Malagasy, sy ireo avy amin'ny Fedrasiona isan-karazany



Ny Ankoay U 25 noraisina tetsy Andavamamba.

ary ireo fianakaviana sy tia fanatanjahantena marobe. Taorian'io fahaton-gavana teny Ivato io, noraisin'ny FMBB «Fédération Malagasy de Basket Ball» manokana tetsy amin'ny Live Hôtel Andavamamba ny Delagasiona ANKOAY vehivavy

U25. Niarahaba sy nankasitraka ny Ekipam-pirenena malagasy Zazavavy ny FMBB, noho ny vokatra tsara azony nandritra an'iny Lalaon'ny Frankofonia andiany faha-9 natao tany Kinshasa RDC iny, ka nanolotra "prime" ho famporisihana ireo

mpilalao tsirairay sy hoan'ireo « staff » niaraka tamin'izy ireo koa. Tetsy ankilany dia notoloran'ny ANKOAY Medaly volafotsy azon'izy ireo ho fahatsiarovana ny filohan'ny FMBB.

Rainilita

Championnat National de Football D2 Phase 1

Fantatra avokoa ireo ekipa mitarika isam-bondrona

Tairianan'ny fahatontosan'ny andro faha-2 tamin'ny alahady 6 aogo-

sitra 2023 teo dia fantatra avokoa ankehitriny ireo ekipa mitarika vonjimaika

isam-bondrona, eo amin'ny fifaninanana baolina kitra «Championnat Na-

tional de Football D2 Phase 1, 2023», ka any Ambanja dia mitarika vonjimaika ny ekipan'ny Fc Zoya Boeny manana isa 6 (+6), any amin'ny « Site Ambatondrazaka » dia mitarika vonjimaika ny 3Fb Alaotra Mangoro manana isa 4 (+1), any amin'ny « Site Tolira » dia mitarika vonjimaika ny Gfjt Betania Atsimo Andrefana manana isa 6 (+6) ary any « Site Tsiroanomandidy » dia ny Fc Inate Vakinankaratra no mitarika an'isa vonjimaika manana isa 6 (+3). Marihana fa omaly alarobia 9 agositra no andro faha-3 amin'ity fifaninanana ity tany amin'ireo "Site" ireo.

Rainilita



Ekipa mandray anjara amin'ny D 2 National.

Delegasiona Skotisma Madagasikara

Miatrika ny 25e Jamboree any Corée Atsimo



Tanora skoto Malagasy any Corée Atsimo.

Miatrika ny hetsika maneran-tany Jamboree andiany faha-25 izay karakain'ny fikambanana skoto koreana, ka tontosaina any Saemangeum Corée Atsimo ankehitriny, izay nanomboka tamin'ny 01 ka hifarana amin'ny 12 aogositra 2023 ho avy izao, ny tanora skoto Malagasy. Efa tongaso any Atsimo ireo tanora Skoto Malagasy ireo ary niatrika avy hatrany an'izany hetsika izany. Nanokatra an'ity hetsika ity tamin'ny fomba ofisialy ny Filoham-

pirenena Koreanina, Andriamatoa Yoon Suk Yeol, ary narahana fifanakalozan-kevitra niaraka tamin'ny Sekretera Jeneralin'ny Firenena Mikambana Andriamatoa Ban Ki Moon izany. Marihana fa nialohan'ny nialan'ny delegasiona teto an-tanindrazana dia nangata-tsodrano tamin'ny Minisitry ny Tanora sy ny Fanatanjahantena Malagasy teny Andohanalakeky izy ireo.

Rainilita

Sakafo Ny Valosoa



Henakisoa sy tongolo ritra indray, no Sakafo eto amin'ny gazetinao androany. Tsara raha hasiana ro matsatso anana sy angivy miaraka aminy. Dia mazotoa homana tompoko.

NY VALOSOA sy Mahaso

Fitandremam-pahasalamana amin'ny tongotra mivonto

Fitandremam-pahasalamana amin'ny tongotra mivonto indray, no Mahaso eto amin'ny gazetinao androany. TONGOTRA MIVONTO ohatran'ny misy rano. RAHA amin'ny HAVIA dia OLAN'NY FO, misy tsy milamina ny fo. RAHA amin'ny HAVANANA dia OLAN'NY ATY, misy tsy milamina ny aty RAHA IZY 2 dia MISOY SIGNE DIABETE, na MISOY OLANA NY VOA. Mila mitandrina tsara amin'ny sakafo sira sy siramamy. Mifadia koa hanina mandritra ny ora voafetra.



NY VALOSOA sy Mahaliana

Ny tanànan'i Vohitravivona distrikan'i Brickaville faritra Atsinanana

Ny tanànan'i Vohitravivona distrikan'i Brickaville faritra Atsinanana indray, no Mahaliana eto amin'ny gazetinao androany. Renivohitry ny kaominina Vohitravivona ity tanàna ity, iray amin'ireo kaominina miisa 17 mandrafitra ny distrikan'i Brickaville. Vokatra any ny vary, ny fary, ny haninkotrana toy ny mangahazo, ny vomanga. Ny voankazo : akondro, letchi, letchi-tsinoa, soanambo, ampalibe.

